

Senza squitsch avessan candidà puspè dapli umens

Davart dunnas en la politica ed il cumbat per ina represchentanza equilibrada

CUN SILVA SEMADENI HA DISCURRÌ
CLAUDIA CADRUVI / ANR

■ **Trais dunnas ed in um èn nominads per dus sez en la regenza svizra. En il parlament sentan ins la ferma voluntad dad eleger duas dunnas. Quai n'è betg capità tut mo da sez ed ord spira creanza dals umens da laschar a las dunnas la precedenza. Cusseglia naziunala Silva Semadeni quinta dal squitsch ch'i ha duvrà. Ella exprima er il quità per las elecziuns naziunales da l'onn proxim: En la chombra pitschna exista il privel che la represchentanza da las dunnas ch'è oz già magra pegiurescha anc.**

Trais dunnas ed in um èn nominads per ils dus sez da Doris Leuthard e Johann Schneider-Ammann. En sasez èsi insatge mai s'udi che tantas dunnas vegnan en nomina.

Silva Semadeni: Gea, quai è nov ed i para propi in bel mument.

Tge hai duvrà per ch'i dettia finalmain nominaziuns uschè decisas per dunnas?

I ha dà in grond squitsch, per exempel da las associaziuns da dunnas. Era la decisiun dal parlament pertutgant l'egualità da pajas n'è betg vegnida chapida: Las dunnas gudognan anc adina damain ch'ils umens e tuttina aveva il cussegl dals chantuns refusà ina pitschna mesira che prevedeva analisis da paja. Il squitsch ha suenter effectuà ch'igl è questa giada stà dapli dunnas ch'umens ch'èn sa messas a disposiziun.

L'emna passada han la pcd e la pld fatg las nominaziuns.

Ins ha guardà tge candidats ch'èn ils pli abels. Tar la pld eri cler che Karin Keller-Sutter haja las megras chartas. Tar la pcd hai dà ina surpraisa cun gist duas dunnas. Sco quai ch'ins auda or da la fracziun hajan las duas nominadas fatg las megras preschentanziuns. Quai è fitg interessant.

Karin Keller-Sutter ha fatg in svilup. Oz èsi pli simpel da chattar cumpromiss cun ella

Questa giada n'han ins pia betg gè la stgisa ch'ins stoppia guardar sin la qualificaziun e betg sin la schlattaina.

Exact. Sche las dunnas vesan ch'ellas èn giavischadas ed han schanzas datti era dapli candidaturas. Ma sch'i n'avess betg dà quest squitsch avant las nominaziuns avessan nus puspè gè bier dapli umens ch'avessan ditg: Jau sun il meglier.

Èsi stà dunnas da tuttas fracziuns ch'han fatg squitsch?

Las dunnas liberalas, quellas da la pcd e las dunnas da la sanestra che battan dapì decennis per dapli dunnas han pretendi candidaturas femininas. Quai ha procurà per il squitsch necessari.

Tge gidi insumma d'avair dapli dunnas en il cussegl federal? En sasez stuessi gea vegnir or sin il medem sche mo umens u mo dunnas politiseschan en la regenza.



En elecziuns vegn batti tenor la maniera dals umens, di Silva Semadeni. Gist perquai dovri dapli dunnas – per che la maniera da politisar sa midia.

Doris Leuthard ha ditg ultimamain insatge che m'ha plaschi fitg bain. «Cura che nus eran quatter dunnas en il cussegl federal essan nus stads buns da prender ina decisiun fundamentala, da bandunar l'energia atomara. Quai è stà pussaivel pervi da las dunnas.» Jau sun segira che las dunnas èn pli consequentas cun prender decisiuns politicas.

Per exempel?

Nus stuain reglar la finanziaziun da l'AVS. Jau sun segira che cusseglieras federalas enclagian bier meglier la situaziun speziala da las dunnas en questa assicuranza sociala.

Per auzar la vegliadetgna da renta da las dunnas duvrassi tscherts cumpromiss.

Meglier ch'auzar la vegliadetgna da renta fissi da flexibilisar quella. Per las dunnas dovri dentant ina cumpensaziun. I na dastga betg esser ch'ellas perdan adina tar las refurmas d'AVS. Là avessan cusseglieras federalas dapli enclatga per las dunnas che ston savens cumbinar famiglia e lavur, che prestan dapli lavur numpajada, che lavuran savens mo a temp parzial u che vegnan pajadas mender e survegnan perquai damain prestaziuns da l'AVS.

Als socialdemocrats han gè gist trais dunnas en il cussegl federal: Ruth Dreifuss, Micheline Calmy-Rey e Simonetta Sommaruga. Tge cultura regia en vossa partida che las dunnas han tant success?

Sin las glistas d'elecziuns avain nus adina almain 40 pertschient da mintga schlattaina. Uschia ha nossa fracziun dapli dunnas ch'umens en il cussegl naziunale. La participaziun politica da la dunna en la politica è per nus d'impurtanza fundamentala e nus ans dain gronda fadia d'avair avunda candidatas. Era l'emprima dunna ch'ha insumma gè la schanza da daventar cusseglier-

partidas ch'ins po metter da la vart las finamiras da l'atgna partida per chattar soluziuns ch'èn bunas per l'entir pajais.

Ma Karin Keller-Sutter resta ina represchentanza da l'economia.

En mintga cas. Ella è commembra dad Economiesuisse, ella sesa en il cussegl d'administraziun da la Bâloise e gudogna là 170 000 francs l'onn. Insumma, ella è ina superliberala, ma ella sto tegnair quint da las autras partidas ed ella ha mussà ch'ella è buna da far quai.

Viola Amherd?

Jau l'enconusch dal cussegl naziunale. Ella discorra era talian ed jau apprezzesch ch'ella ha ina tscherta lingua, era sch'jau na sun betg adina perenclatga cun ella. Tar la revisiun da la planisaziun dal territori ch'il pievel ha approvà il 2013 era ella complettamain da l'avis contrari. Però era ella è tenor mai ina persuna che chapescha da lavurar en in team sco il cussegl federal. Ella è buna da respectar las finamiras dad autras partidas e da tschertgar soluziuns acceptablas per ina maiorità en Svizra. Quai è il pensum dal cussegl federal, era sch'igl è daventà moda da defender be pli ils interess da l'atgna partida.

La campagna encunter Viola Amherd – è quai ina campagna ch'ins n'avess betg fatg uschia encunter in um?

Pussaivel ch'ins n'avess betg fatg ina campagna uschè ferma encunter in um. Però en il Vallais datti savens talas istorgias. Plinavant san ins che Oskar Freysinger è stà davostiers. El n'è betg vegnì reelegì sco cusseglier guvernativ. Igl è forsà stà in pau ina vendetga. Jau na crai betg che quai gioghia ina rolla en il parlament.

E Heidi Z'graggen?

Jau l'hai emprendi d'enconuscher sco presidenta da la Pro Natura. Cun ils delegads da la Pro Natura sun jau stada en il chantun Uri nua ch'ella ans ha mussà sco cussegliera guvernativa la revitalisaziun dal delta da la Reuss – tut fatg nov, d'avantatg per la biodiversità e per il passatemp da la glièud. Ella ha in tschert interess per la natira, quai ma plascha. Cun sia experientscha guvernativa è ella ina candidata valabla. Ella è pli conservativa che Viola Amherd. Lezza è pli averta en tscherts temas ed enconuscha meglier la politica federala.

Pudessi esser in dischavantatg per Z'graggen ch'ella ha promovì l'interprendider Samih Sawiris e ses resort ad Andermatt?

La maiorità en il parlament federal demussa simpatia per il project ad Andermatt, ina vischnanca ch'ha gè gronds problems cura che l'armada è sa retratga. Heidi Z'graggen ha promovì il resort ad Andermatt ed ha collavurà cun las organisaziuns d'ambient. Igl è però in project ch'ins po era criticar, jau na crai betg ch'el haja grond futur.

Tgi elegis Vos ils 5 da december?

En mintga cas duas dunnas.

Vus essas stada cussegliera naziunala dal 1995 fin il 1999 e lura puspè dapli il 2011. Vos enconuschai pia, danor Elisabeth Kopp, tuttas cusseglieras federalas. Tgenina ha impressiunà Vos il pli fitg?

I ma vegn endament gist trais. En ils onns novanta hai jau emprendi d'encon-

nuscher Ruth Dreifuss cun la quala jau hai anc adina contact. Ella è ina persuna coerenta, curaschusa ch'ha battì per l'artitgel da linguas ed aveva gronda enclatga per las minoritads. Lura hai jau grond respect da Simonetta Sommaruga. Cun ses departament sto ella tractar temas difficils sco asil e migraziun e manar battagliais en il parlament. Ella è capabla da preschentar propostas che vegnan acceptadas. Quai na plascha betg a la pps ed ella vegn adina attatgada terriblamain.

Quai fissan duas cusseglieras federalas da la sanestra. Ed ordaifer Vossa partida?

Jau lavur en il sector da l'energia, da l'ambient e da la planisaziun dal territori. Là avain nus cun Doris Leuthard in «animal politique» incredibel. Jau hai grond respect da questa dunna. Ella è adina cudeschada bain, era en fatschentas cumplexas sco actualmain davart las emissiuns da CO₂. Ella ha dumagnà atras la strategia d'energia ed ha sco politica da l'Argovia gè il curaschi da midar ses avis pertutgant l'energia atomara. Igl è ina cussegliera federala simpatica cun umor. Insumma, quellas dunnas che nus avain gè en la regenza èn bunas dunnas. Capablas e cumpetentas. Fitg bunas regurdanzas hai jau era vi dad Eveline Widmer-Schlumpf, curaschusa ed adina preparada fitg bain.

Heidi Z'graggen ha in tschert interess per la natira ed experientscha guvernativa

Tge è sa midà dapi il 1995 en il parlament puncto represchentanza da dunnas? Èsi vegnì meglier?

Sche nus guardain sin las leschas en mintga cas. Nus avain biers meglieraments. I ma para però che la participaziun da las dunnas gjaja enavos. L'onn proxim avain nus elecziuns naziunales e nus stuain lavurar fitg per avair avunda dunnas sin las glistas. En il cussegl dals chantuns avain nus oz set dunnas sin 46 sez. Quai è memia pauc. E sis dunnas na candideschan betg pli. La perspectiva d'avair en il cussegl dals chantuns en la proxima legislatura anc damain dunnas è schon ina dischillusiun.

Vus schais ch'i duvrass dapli dunnas sin las glistas. Ma ins dumonda gea las dunnas. Stuessan ellas simplamain avair dapli curaschi da dir gea? Nua manchi?

La vita è dira per las dunnas en la politica. Il Grischun n'ha uss lura nagina dunna pli en la regenza. E tar las elecziuns federalas vesain nus lura tge che capita? Jau sper che las dunnas hajan il curaschi da dir, jau candidesch. Igl è simplamain fitg dir en il cumbat electoral. Igl è ina moda da cumbatter per umens: Quel che discorra meglier, quel che discorra dapli e quel ch'è bun da chatschar a chantun ils auters è in bun politicher. Las dunnas han plitost l'idea da lavurar ensemen, lavurar in in team. Er jau resent uschia. Jau n'hai betg gugent questas debattas nua ch'ins sto disfar ils arguments dals auters empè da chattar ensemen ina soluziun. Las dunnas han exact questa maniera da lavurar. I dovra perquai dapli dunnas – per che la maniera da far politica sa midia.